

四庫全書

集部

欽定四庫全書

少室山房集卷三十四

明 胡應麟 撰

五言律詩七十二首

家大人七秩恭賀四首

榮爛長生籙
高懸灝水陽
中元秋屆節
南極夜生光
黃鶴吳天外
青鸞越海旁
惟應雙瑞曲
永送萬年觴

懿行三千就
遐齡七十延
竹宮觀禮日
蘭署校文年
六

傳巡滇騎雙旌入楚船謳歌猶咫尺拜舞大椿前
華堂開壽域瑞靄接瑤池十地來菩薩三天降辟支名
猶喧隸卒化已洽邊陲何限朋游集千花照玉卮
慎默藏身寶圓明應物蹤年高黃叔度世擬郭林宗日
月遲玄草雲霞戀赤松八千春共祝寧羨渭濱封

寄居曲水園東張氏伯仲二首

自愛新居僻寧論故業貧伯通能借廡仲蔚已為鄰茂
苑花淹客吳門藥贈人蒼茫太湖底生事起垂綸

獨有陶公徑能停謝客輿陸渾虛舊宅陽羨覓深居水
木孤軒外雲蘿四壁餘何如傳舍客日月敝長裾

嶺南陳孔信贄其詩來謁報贈二章

何物元龍少囊攜絕妙詞百篇難汝第一字媿吾師劍
擊要離家壺傾泰伯祠錢塘萬家雪隻棹慰相思

驟發扁舟興佯狂到海涯詩成筒寄草夢斷筆生花把
贈羅浮雪迴看茂苑霞鱸鄉亭下館歸路欲棲鴉

過張水部新居

負郭成三徑郊原帶草堂
飛甍搖海氣畫檻納江光
花色吳門近棠陰越里長
中朝思大厦未許醉清商

過婁江載宿弇園時問伯逸季並以事留雲間
獨房仲在下榻款留亡異長公存日感賦此
章

十日懽猶洽千秋態未忘
開尊憐仲子下榻夢中郎
旅色停孤棹歌聲咽後堂
屋梁明月滿惆悵夜何長

小祇園懷問伯逸季

寂寞雙林下，遲迴一杖過。
盛名猶宇宙，陳迹已山河。
落月連枝遠，悲風大樹多。
獨將知己淚，爛漫洒青蘿。

澹圃訪王閑仲及二弟淵季征叔留集作

夜久尊偏綠，更闌燭尚紅。
雲霄三雋在，海岱二難空。
舊業東陵異，新懽北海同。
那將季扎劍，兩地挂悲風。

陸楚生新居在弇園澹圃間邀余齋中啜茗即

席賦

愛爾新居僻，令余世事忘。
一瓢寒樹裡，四壁浣花傍。
鴻

漸餘茶竈龜蒙但筆床坐聞鄰笛起涕淚滿山陽

再過陸楚生

小築婁江畔蕭然四壁空
斷橋流水外茆屋亂雲中
意交胡質長歌問陸通
猶憐傳舍客彈鋏卧秋風

夜卧沈子書齋出素箋索題信筆賦

褥許分青錦厨仍卧碧紗
濃香熏柏子清夢雜梅花
未覺仙家好渾忘客路賒
異時懷仲舉湖水渺雲沙

伯隅童子治卿持扇索題走筆一律贈之

偶遇張公子頻年擁素琴
貌堪酬白璧名已鑄黃金
作調鞭老時為捧劍吟紅
綃遇何日倩汝入花陰

送吳刺史之桂林

莫作炎荒嘆騫騰識鳳麟
棠陰流阜蓋桂實墮朱輪
雨潤遐陬俗風馳絕徼塵
好將南國化沐浴瘴鄉人

陳方伯自閩中移蜀寄柬

奏事馳仙闕除書下聖朝
揚於江樹合行部海棠嬌
雲暗三峨寺天長萬里橋
浣花溪上路詞客可重招

蔡生移居城北招飲作

諱英南

咫尺城東寓相尋路未遐懷人閩海荔留客武夷茶几
席凝香霧杯盤散綺霞成行兒女在祇合老天涯

蔡僑居余

邑十年至
長子孫

過郭翌之故居有感

尚憶鴻臚第淹留白日斜新墳俄宿草舊圃更殘花地
迴悲鄰笛天清咽暮笳異時風雪滿孤棹問誰家

贈張真人

何年赤松子羽節到皇家步躡飛雲履遊乘貫月查珠
宮浮紫貝絳闕煉黃芽應笑唐供奉仙裙滯九華

壽郭隱君

蒼茫翠微半突兀見孤亭大壑懸真氣高天臥客星桐
江標勝迹廬阜毓英靈不盡名山色東南萬古青

題孫生別墅

小築寄林泉蕭森十數椽蘇門飛嘯日郢國和歌年室
靜飡霞飽牕虛臥月便谿蘭一以擷為汝拂冰絃

題朱茂才孝行卷

有序

朱茂才伊臣余丁丑同進士也古樸真至細
行必矜事父母能竭其力尤重然諾為閭閻
所信從諸黌士美其潛德咸詩歌以咏嘆之
余引諸簡首

千古朱家俠芳聲異代留蒸梨知孝行淪茗見清修烏
鳥心長切羔羊願未酬君看彤史筆卓犖下螭頭

朱生
灌園

以養二親余嘗食其
梨茗皆手自培植者

寄何穉孝

邂逅清源下差池易水濱
心期元獨許意氣本無羣
六翮排青漢孤蹤傲白雲
春風上林苑擊節子虛文

少宰趙公還北寄送

餞別列鸛鴻懸腰劍色雄
台垣三殿近冢宰二京同
禁樹連雲紫庭花傍日紅
掃門饒賦客寧復嘆飄蓬

少宰趙公拜相寄賀八章

一夜求賢詔懽呼萬國同
謨謀咨大老啟沃仗元功
絕

域車書會中天劍爲崇異時評太史何羨帝臣風

翊運逢明主匡時倚上材尊榮逾四岳寵渥重三台
水初調鼎華陽已築臺早知霖雨澤六合淨炎埃

玉鉉調賢佐金甌扈聖朝羣龍齊捧日雙鳳各凌霄大業

臯夔近榮名稷契遙蓬萊雲五色燦燦近人飄

時洪都張公同拜

滿目乾坤事關心社稷臣八荒懸密勿九域藉經綸
煖閣調羹夜平臺賜宴辰好將司馬業傳播外番人

六館推名德三司備羽儀麻宣鵠鵲殿草輟鳳凰池禮

樂重興日詩書再覩時太平方有象寧訝廟堂遲

鳳詔輝綸綍龍光切冕旒坐調中極鼎永作大川舟八
表清風被三朝壯節留長安貴遊滿處處撒行騶

尚記臨軒日龍頭曳珮環帝心懸北斗人望切東山變
理陽春布論思乙夜閒萬方伊葛想翹首玉宸班

上相同心日真儒佐命年白麻初翊聖黃閣驟招賢吐
握迴三代吹噓動八埏宵教揚馬輩頭白卧林泉

長至後三日幼于齋頭對菊同張使君陳文學

周山人陸孝廉即席分賦得寒字

節已過長至花猶耐早寒似忻彭澤米偏稱汨羅餐
裊裊團霜砌亭亭立露盤何當擷千朶爛醉赤欄干

過王氏小隱同陸山人周上舍閣中小集

信步綠蘿庄春波夾畫牆壺中歲灩澦盆底著瀟湘
曲折花為逕縱橫竹繞廊乘風時一到好是白雲鄉

夜過周懋脩館中月色盈庭皎如霜雪即席口

占

咫尺周郎館，衡茅葑水傍。披襟流素月，把袂落繁霜。逸
調陽春遠，清歌乙夜長。預愁明發路，楓葉亂金閭。

西林汎舟即席作

谷口肩輿入，悠然興未窮。尊前五湖盡，檻外十洲通。削
壁籠丹霧，飛梁掛彩虹。坐聞天籟發，兀兀萬緣空。

賦得壯士樂長征

言從漢飛將，結髮隸行間。列戟秋乘障，揚旗夜出關。雙
雕婆勒渡，獨馬賀蘭山。寧憶空閨下，梅花樹樹攀。

過沈材叔留卧齋中作

華亭疎雨過小閣亂雲流榻為延徐下船因問戴留春
光迴枕簟寒色駐衾裯十日猶能客從君笑薄遊

贈錢將軍

征馬去飄飄將軍舊度遼運籌推武庫橫槊羨英標轉
粟三吳盡飛芻六郡遙煩君持大燾取次靜氛妖

司馬汪公以仲淹訃至寄挽二章

消渴真憐汝幽憂竟若何一尊猶水曲

暮春司馬修禊
仲淹興疾別余

于曲水亭萬事已山阿舊業荒蘭芷遺文照薜蘿異時軒冕

貴較仲定誰多

落詞人長飛揚俠客儔生寧慙一諾死欲擅千秋失
弟憐司馬從師困伯牛天都亂山色何處挂吳鉤

寄丁元父

聞道丁元父筵傾鄴下才政成初百里名動已三臺岸
幘尋芳草彈琴坐落梅尚思風雪裡並馬立蓬萊

題章氏木假山

早謝樵人斧悠然野客家雙峯寒宿霧列幹迴撐霞埋
沒溝中斷飄零海上查逢時千載事為爾一長嗟

蘇君禹留集翠虛亭共賦二首

一徑雙松裡孤亭萬竹旁高秋全障日盛暑欲凝霜籜
自翻龍虎枝從宿鳳凰畫簾清絕處渾擬坐瀟湘

百尺烟霄上千竿霧雨餘綠陰浮枕簟蒼靄淨庭除寂

寞王猷駕蕭森杜甫廬何如偕篠簜取次貢乘輿

時君禹方

校秋
試文

易惟效署中避暑同賦四首

逃暑仍河朔尋幽到習池青絲行共挈白幘坐頻敲
密竹團書舍疎花照奕棋黃鸝似相識恰恰在高枝

落日孤亭上微風動碧梧淨疑開雪檻涼似浴冰壺茗
竈供新瀹楸枰覆舊圖吟餘藝沈水雲起博山爐

竹樹參差綠葵榴爛漫紅徑幽長蔽日林密盡含風白
羽高談洽青萍醉色雄大夫饒酒德無擬笑山公

舊識燕臺下新知越水濱乾坤雙傲吏海岱獨歸人薄

有騎羊骨能同躍馬身萬山巖子瀨秋色未全貧

送友人遊邊

憐君隨漢將策馬度燕臺六郡風沙合三邊雨雪催邊
笳秋色遠羌笛夜聲哀來歲看花節還聽草檄回

送李從事之南康

十載京華陌還為故國行岸花飛客舫江草問王程曉
夢匡山月春烟白下城誰堪萬里外尊酒動離旌

壬申夏生日途中作

時余年
三十一

此日還初度葵榴照綺筵鯤鵬聊息翼犬馬漸增年賈
傳書難上終童策浪傳平生四方志覽鏡一茫然

寄題王中丞小祇園二首

欲問西天樂聊同北谷愚山圍迦葉坐水淨法蘭居藏
室棲龍象經文蝕蠹魚慈航容並載吾亦慕真如

萬古乾坤意居然見草堂淨心超大士彈指謁空王永
悟三生劫時繙二酉歲何如浣花叟白首杜陵庄

金山寺

絕頂開樓殿中流見畫圖雲霞千界合宇宙一山孤遠
浪晴連蜀奔潮夜到吳向來舟楫念寂寞對江湖

錢塘秋望

郡國三秋迴烟波四望開潮深吳相廟山繞越王臺遠
樹天邊沒孤帆日下來安期如可遇指點向蓬萊

寄朱汝修兼訊李惟寅

不見朱生久新篇近若何雲山孤鶴在江海斷鴻多策
室移青桂鳴琴掩綠蘿李侯詩句好騎馬日相過

寄朱在明

獨有金門客頻年隱未迴
扳花遊漢殿駐馬上燕臺
梅福神仙吏相如賦頌才
五雲空極目何處是蓬萊

送人遊燕中

亂山霜色裡行客迴添愁
萬里看黃鵠孤心寄白鷗
高風沙塞晚明月海天秋
莫以劉義劒狂歌對五侯

暮行桐廬道中

納納驅行旆遙遙泛客槎
萬山蔽鳥道一水護漁家
東

峽天形小奔崖地脈斜嚴陵磯畔月蚤已著蘆花

泊舟登釣臺作

峽口抱雲汀中流坐放舫亭高雙逼漢臺迴一窺星海
氣吞江白山光壓瀨青綸竿千尺在吾計漸沈冥

寄蔡侍御

憲節初臨蜀征輶舊出秦襜帷開氣色斧鉞靜風塵峽
口雲迎客峨眉雪照人海棠花萬樹夾路待西巡

送蔣祠部北上

豈意青雲客飄然過草堂
龍門留問字鳳閣待含香
萬樹長楊外千花太液傍
何人年弱冠議禮動明堂

聞裕卿移居山中寄詢

移家仍絕嶠秋色滿垂藤
磴裏雲千尺峰迴月半稜
龍湫寒獨卧雁宕曉頻登
我亦耽奇客尋君愧未能

喻邦相遷守括蒼寄賀二首

有序

邦相以錢塘別駕擢守括蒼
舟過澌水訂余以是秋把臂
仙都余以病未能賦此寄憶

祇緣香閣吏領郡亦仙都重鎮初移節名山獨剖符
兒童迎彩鷁父老認青鳬不奈溪頭別桃花覆酒壚

試縣名方藉專城寵驟加符分蒼嶺月綬結赤城霞
吏散朝行郭官閒午放衙何如遷客泪九載濕長沙

朱在明初至長沙詩以問之


浩渺銀河色孤槎起壯遊亂山雲夢澤斜月武昌樓
解珮湘娥去鳴笳楚客愁尺書能遠寄迴雁滿高秋

聞蟬二首

白雁將秋至玄蟬入暮催清吟隨落葉密响度高槐暑
覺簾攏斷涼俄枕簟迴日長堪聽汝無擬抱琴來
客醉秋山底蟬吟白露時淒清流古木斷續倚高枝靜
逐涼颼轉低舍夕照移枋榆吾自適九萬欲何之

秋日過王世周寓逢汪仲嘉潘景升賦贈

逍遙孤客邸邂逅二豪吟面貌誇聯璧風期得斷金琴
書雲閣迴杖屨雪房深後夜芙蓉色湖頭次第尋



少室山房集卷三十四

欽定四庫全書

集部

少室山房集卷三十五
七至

詳校官編修_臣 程 槐

侍讀_臣 孫 球 覆勘

總校官庶吉士_臣 何 思 鈞

校對官中書_臣 王 鍾 泰

謄錄監生_臣 畢 所 諱

謄錄監生_臣 張 士 琛

欽定四庫全書

少室山房集卷三十五

明 胡應麟 撰

五言律詩八十七首

題野鶴孤雲卷贈閔道人

有序

始為大中丞作歌贈閔尚未識面是冬北上
過小祇園適閔自茆山至袒膊科頭雙懼玉
赤行步若飛信異人也而風度甚爽朗真率

絕不為詭秘狀自云與某道者訂期蓮花峯
下十年矣將以歲杪往踐茲約特就長公乞
言因出冊子皆一時名士題贈余曩賦長歌
亦在焉長公援筆書四大字曰野鶴孤雲而
屬余更綴一詩即席四十字并紀其人

科頭無一事松下日盤桓骨相堪鵬背生年異鵬冠月
輪天柱頂雲色洞庭干薄暮揚舲去相攜問大丹
秋日溪南晚眺適趙生攜酒共酌村店中

行行隨杖履徙倚夕陽斜野寺明楓葉山籬著豆花飛
鷗過淺瀨浴鷺上浮查之子期方到悠然問酒家

寄大司空朱公六首

有序

公屢以手書見招屬家慈病未能赴踐宿約
懷仰之暇集成六章聊代起居云耳

德望三朝舊勲名八座餘廟堂周太保劍履漢尚書翼
矯丹霄鳳鱗潛碧海魚惟應並南斗萬古照匡廬

賜履優前代乘桴記昔年龍蛇驅大陸蛟鱷奠長川宦

績崑崙外神功碣石前試看淮瀆廟禹碣至今傳
社稷憂仍在中華問轉頻帝能優大老史已傳名臣紫
氣偏南極青雲自北辰無論漢宮遠玉樹正嶙峋
里閨知司馬乾坤識卧龍為園名獨樂抱膝寄孤悰瀑
布簷前水香爐坐石峰大江西望處愁絕暮雲重

長日東林下看花自閉關綠偏裴相野青占謝公山嘯傲

藜床靜登臨竹杖閒獨餘憂國夢時到紫宸班

李詩宅近青
山同謝朓

尚憶風塵際能高物色情吹噓慙國士吐握為儒生山

水孤琴合虹霓一劍鳴含珠十年夢無路報投瓊

公常賞識

余詩於童子時余故每有國士之感

王孫貞吉以手鐫印章寄惠走筆奉謝

遙遙雙玉佩贈我意何勤石鼓周王篆金泥漢帝文蛟螭寒壓霧科斗暗藏雲萬古岫嶠碣何時一對君

雪夜邦相過齋中小集四首

寂寞幽人卧追尋茂宰賢飛觴臨夜雪把袂坐高天剡曲三更棹梁臺萬古筵異時吾黨事蘭水定誰傳

不謂山齋雪能來侍從臣談詩雙郢客和曲幾巴人玉
笛生春早金尊促夜頻曉來飛鳥處瑞氣滿楓宸

彩筆寒相對朱絃晚故留飛仙誰鶴氅野客自鸛裘擁
坐城雲立窺筵海月流預愁新賦出人擬兔園遊

此夜平原醉人間更有無乾坤懸玉闕日月坐冰壺磊
落新詞社蕭條舊酒壚灞橋回首處淒絕斷雲孤

與惟寅一別淹冉五載消息不復相聞春來忽

得手書新刻見寄賦懷五首

賜履傳周室分符衛漢京白虹懸結客紫電照論兵
四百西山寺三千大內營幾因飛檄暇出郭遍題名

帶礪中朝望詩書上將才珮刀初制閫橫槩自登臺萬
騎長城合孤鴻大漠迴河梁人漸老吟望獨徘徊

長嘯青油幕雄談白璫巾射鵬新驃騎圖象舊麒麟雪
照梁園夜風高瀚海晨遙遙雙鯉下猶憶尚玄人

憶昔長安騎相逢狹路間乾坤雙彩筆吾汝各紅顏萬
感歸來集千秋病後閒惟應別時夢繞夜向燕關

一代華陽社平生碣石遊坐攜鸛鷺侶吟傍鳳凰樓夢寐猶青眼形容漸白頭尺書聊寫寄涕淚盡南州

寄朱在明光祿

夙昔長安社朱家興獨豪深杯傳竹葉艷曲度櫻桃官拙從雞肋身閑付蟹螯近來偏憶汝愁望大江濤

寄丘謙之

底事丘靈鞠年來復罷官驚心吾道左落鬼世途難月過衡峯近星離益部寒九歌何日就洒泣傍南冠

寄朱汝脩山人有序

汝脩業醫而余好談長生迺京華日朱生最
稱善病余頃復嬰疾彌年兩病軀南北相望
良可笑也因詩訊之

掌露偏誰得秋風各未蘇骨仍滄海立魂傍碧山孤白
帋名先後青囊術有無幾時攜竹杖燕市問懸壺

再寄在明

在明家有聲伎之奉近聞其方再納寵因寄

見說休官後鄉園樂更饒屏開張靜婉坐列董嬌嬈紫
電黃金勒紅霞白玉簫興來應載酒時醉廣陵橋

滕汝載先生卜築武夷邀余過訪余以家慈臥
床褥尚孤此約感念今昔不勝悵惘敬賦小
詩奉寄凡八章

北極聲華久東山氣象新乍辭文苑秩初乞武夷身關
地連三島看天臥七閩惟應幔亭月時傍紫綸巾

九曲移家近三山入望遙樓臺臨碧漢戶牖逼青霄坐

叩梅仙訣行逢木客謠祇疑塵世隔無路問漁樵

遊神近何所三十六峯前鳥下談經榻猿窺問字船飛
蘿懸白日古樹拂蒼烟彷彿秦人住桃花隔澗泉

勝許龐公擅名應善卷逃挂瓢滄海濶倚杖碧山高萬
事留青鬢孤忠藉彩毫無嗟塞翁意天地一鴻毛

柳色吳天夢梅花粵嶠情吏才高漢代儒術重周京霧
澤南山豹雲寒北海鯨無言帝閣隔咫尺是蓬瀛

黼黻真王佐絲綸覽釣徒中天儀鳳杳大海蜚龍孤入

夢猶金鑰翻歌自玉壺向來門下士桃李遍三吳

作賦慙鸚鵡空羣辨鵬鷃千人推稷下一士擅襄陽色

借青雲迴心懸白日長惟應夢中路惚忽到滄浪

滕公督學

浙中於諸生中獨以異等見遇

九折王陽道千秋大隱廬雲山容負笈宇宙礙驅車業
豈門人盡名猶國士餘憑將一掬泪徧洒越山隅

得安仲子書却寄

嘆息延陵客清才獨後時三都全入賦五岳半題詩壯

節摧青鬢雄心狎翠眉
吳天花欲盡好訂白雲期

懷祝鳴臯

南歸書札斷北望舊遊孤
一鍛悲鸞翮三年問狗屠
汝才寧巷陌吾道實江湖
幾夜狂歌發寒雲碎玉壺

奉寄司成許公二首

一代崇周學諸生侍魯儒
田何慚受易伏勝早傳書
八座飛騰外三垣悵望餘
猶思問奇日大雪滿庭除

載籍窮金馬論思坐玉堂
洪鈞迴稷契大典翊成康
日

近尚書履霞明學士裳生徒愧原憲十載夢長揚

上元觀燈有懷京華舊游時集邦相署

山城逢令節燈火暫同遊月映千花上星從萬樹流
簪連紫陌委珮出朱樓不是金吾地無妨徹夜留

遠憶長安道華燈正陸離雲霞千蜃結山嶂六鼇移
玉珮邀春早銅壺聽夜遲即今天祿畔太乙傍誰嬉

周公瑕書來索余贈言為賦二首

作賦元驚坐臨池更擅場真行王大令篆隸蔡中郎巨

榜高天揭窮碑絕域藏太湖花滿目斟酌欠書航

景聯
韋誕

歐陽詢事周素
怖水故尾句云

詩名人自老墨妙世誰如瘞鶴高風在籠鶯逸興餘
藜然中壘坐花浣少陵居最憶長安日垂髫問子虛

顧朗生山人以四詩見貽賦答

萬感紅顏盡孤蹤白眼餘何堪梁苑客遙寄茂陵書
雪色晴偏照星芒晝不除太湖蓼艇畔誰共覓鱸魚

意氣塵埃外心期夢寐間一尊違白社十口共青山
桂

樹幽人賦蓮花國士顏倘懷天姥雪拂石候柴關

極目皋橋客長歌扣玉壺天藏林屋遠雲壓洞庭孤卜

築仍三徑浮家任五湖試探吳市女能識姓名無

不謂菰蘆畔頻年見偉人高天容荷鍤大海傍垂綸一

壑心長戀千秋業未貧異時雙劍合誰謂白頭新

寄謝宗伯何公四首

時得寄忠燕中書
并新刻大復全集

十載瞻台座三春佐秩宗文章空左馬禮樂擅夔龍

下才偏盛河南譽日宗殷勤大玄草猶記昔相從

燦爛遺編在崢嶸大雅留黃河龍馬出紫閣鳳凰遊李
薛年誰少徐邊譽豈傳不辭扳逸駕世業在瀛洲

少日遊金馬平生近玉宸中天迴雨露絕域望星辰咳
唾千秋迴吹噓萬象春慚無杜陵句池上贊絲綸

尚憶梅花下飛觴醉玉堂先春大庾月逢曙廣陵霜鬢

惜年來短情偏別後長綈袍今古汨寂寞洒滄浪

業寓燕日

何公招余飲梅花館
中聯句達旦者再

寒食夜集邦相署中分韻得吟字

荏苒逢佳節，招攜見苦吟。
乾坤雙劍色，湖海一麾心。
柳密陶公署，花閒安子琴。
蘭陵今夜月，百里為誰深。

又得卮字

萬古山城畔，風流見此時。
署元方朔隱，亭更子雲奇。
片月窺簾下，疎星抱席移。
祇應雙白眼，兀坐把深卮。

題大司空潘公芝林二首

熒熒鍾靈草，青蔥發澗阿。
九光呈玉葉，三秀挺瑤柯。
滴露滋苔蘚，蒸雲映薜蘿。
蚤知王佐出，寢殿有興歌。

丹崖藏淑氣白日湧靈葩
百本俱擎露千林競照霞
瑤池仙母住勾曲羽人誇
寧似商山客成功翌漢家

聞裕卿卧病有懷

茆屋何年借柴扉盡日扃
已無人和雪誰問客為星
病骨留東海雄心付北溟
暮雲回首處寂寂萬山青

得何仁仲書

舊事燕臺下看花汝亦狂
雙鴻俄越嶠匹馬竟瀟湘
賦就人千里書來泪八行
向來神女約早晚到高唐

題元旦早朝卷

玉殿春風起金門曙色通
珮聲千柳外旗影萬花中
鳳
歷頒羣后鴈行列上公
陽春纔一曲擬獻大明宮

題大閱卷

劍珮中天出旌旂大漠開
風傳青海戍霧捲白登臺
列
陳盧龍動翻營涿鹿迴九
邊銷燧色橫吹莫興哀

秋夜諸子過集

豈是談玄宅偏令問宇過
客當蓮社滿人比竹林多
霽

月流丹嶂飛星度絳河
母悲秋夕永散髮向藤蘿

寄劉子大金吾

玉禁康侯寵金吾上將榮
潛消三輔俠坐偃百蠻
兵夜月雕弓滿秋霄畫戟明
共誇遊獵暇時入建安盟

懷劉觀察仲脩

幾夜懷高適當年賦上林
高虹流擊筑朗月墮鳴琴
客散誰燕社人歸自越吟
西山暮樓殿極目薊雲深

寄宮詹陳公二首

執戟元中秘鳴珂更上公雲霞流紫殿日月扈青宮
落燕臺駿飄零越嶠鴻台垣何處切五夜望寒空

建禮樞趨近延英進讀勞露溥金掌重雲斂玉繩高苑
樹縈朱紱宮花落彩毫尚思燕市夕濁酒坐持螯

哭康裕卿五首

有序

始余年十六遊長安邂逅裕卿於友人席上
裕卿得余詩讀之即狂叫擊節曰子珍重必
有聞於世自是定交無間者十數載迺今裕

卿不可作矣聞訃哽咽情見于詩

搖落龍蛇歲天南墜客星寒灯孤月白遺塚萬山青永
閉高人宅誰題處士銘傷心舊朋輩十載遞凋零

宿草孀妻奠遺編稚子留山陽愁聽笛剡曲恨迴舟九
死還初服三生記舊遊跼蹐季札劍日夜夢東甌

忽跨遼東鶴誰瞻薊北鴻雲山藜杖在天地草堂空隴
樹經時碧原花著處紅終令石門谷千古號愚公

漂泊南遊日崢嶸北上年狂名懸楚越俠氣動幽燕大

雪行歌外長虹擊筑前向來攜手客老泪盡江天

垂髫游洛邑識面記燕城問賦驚文考投詩謁正平大

鵬猶宿契老驥忽悲鳴地下梁鴻在應酬碣石盟

裕卿與思

伯契分殊厚今
先後入岱矣

秋日送人之彭城

柴門喬木下送汝一含杯大澤秋聲早長河曙色開陰
風韓信廟紫霧漢王臺后夜芒山氣誰尋吊古才

為邦相題蕉石圖

圖出元人張伯
雨貞吉所臨

寒蕉依怪石仙液貯銅餅日夜孤根老冬春片葉青風
疑搖鳳尾雨欲化龍形恍對張勾曲星冠坐草亭

王長公寄惠集序賦謝四首

字字風霜色緘題向草廬百年雙涕泪萬古一吹噓附
驥名難盡屠龍業未虛異時歌九辨寧敢忘三閭

漈滅書生刺迢迢國士恩片言猶海嶠三賦已乾坤道
豈中原喪交寧異代論尚拚雙鬢在垂白子雲門

家學三王上時名二李前江河趨大壑日月並高天業

已迴長夜名猶借少年代興聊一鉢
點點少林傳
刻鵠紛難辨鳴蛩獨見知左遷元命世揚馬快同時一
字人堪老千秋客自遲會攜孤劍色東海傍要離

送金大參入滇

除目下楓宸飛旌動去塵共看金馬客遙問碧雞神
草色窮南服花香夢北辰到時薇省宴猶記六橋春

寄董太史二首

作賦俱青鬢攜書共赤墀我懷三秀草君奪萬年枝
鸞

鶴甘泉殿魚龍太液池當年六橋柳能記共舍卮
世事甘余拙時才羨爾長讀書同左史執戟異東方霧
擁金門色天迴玉陛香深慙潞河鯉萬里到滄浪

送人之黔中

匹馬衝寒霧孤城問瘴烟花深羅鬼地箐密夜郎天野
戍傳諸葛藂祠賽謫仙五谿相望處白日墜飛鳶

送人遊邊

嚴冬武林驛一騎問京華大野霜飄樹長城雪作花橐

鞭迎屬國劒珮逐輕車早奪天山地銘功入漢家

題東臯園亭卷

近卜東臯墅推窻面面山榻懸雙樹底亭鎖萬花間白
鶴迴孤嘯蒼龍問大還異時藁桂發尊酒定同攀

送張山人楚遊

岩穴憑誰問飄然賦遠遊風高雲夢笛月滿洞庭舟短
刺攜孤客長裾狎五侯蛾眉亭下泊飽看荻花秋

南屏逢沈李二生談道因約余遊天台口號戲

贈

越國奇男子吳中偉丈夫游心出蓬艾把臂入菰蘆龍
虎蟠金鼎鴛鴦語玉壺天台八萬丈指點向虛無

夜集李景穎出土瓜佐酒成賦二章

有序見文集

雲霞蒸上瑞冰雪薦華筵醒酒功侔石烹茶味勝泉梨
非張氏谷瓜豈邵侯田好比金莖液分攜漢闕前

司理耽奇甚甘瓜薦味長飛霜勻玉質重露浥瓊漿碧
荔唐宮重丹桃漢殿祥何煩方朔盜袍袖溢芬芳

贈孫國梁

談玄吾不厭問字爾相尋興逸飛流賦情高漱石吟春

郊聯玉勒夜閣擁瑤琴二仲翩翩在何煩覓向禽

時金生數

同過飛流漱石
皆孫氏事也

題性天真孝卷

有序

惟孝使君族子某七歲而刲股救其親奇節

也聞者咸為詩歌以美之使君因集集成冊云

焚香星月下一巒冀親延詎意揮刀日纔同扇枕年孤

誠迴大造至性徹重泉莫以昌黎論雌黃孺子賢

潘翁九秩詩為望之茂才作

玉醴汎蓬池瓊枝煥陸離玄纁遲伏勝帶索異縈期種
橘盈千頃栽花但一籬不知柯幾爛猶閱洞中棋

題中丞滕公武夷精舍圖

有序

先生自癸未拂衣卜築武夷之上日與二三
同志講業其中放舟曳履之暇時寓意棋奕
間此圖磐石方廣數丈上設楸枰坐而手談

者先生泊里社楊君李君皆生平莫逆友也
圖于先生貌酷肖仲子萬里北上出示索題
瞻玩再三不勝國士之慟謹賦五言律一章
精廬聊十尺坐嘯建溪湄
斲挂中丞笏閒揮太傅碁
野花蒼鹿獻林果白猿持惆悵
流風逝徒瞻大樹遺

送李內翰入都

一騎衝寒發梅花照客顏
亂雲揚子渡殘雪皖公山
舊直青綾被新恩白玉環
夜來前席夢光到紫宸班

寄李允達二首

底事翩翩客長懷落落愁
驥心猶五夜雞肋已三秋
犢敝相如袴貂殘季子裘
長門售何日少婦繞機愁
失意真憐汝沾衣向薜蘿
屠龍人未識買駿客頻過
投筆徒為爾焚舟竟若何
千秋吾道在異日較誰多

少室山房集卷三十五

欽定四庫全書

少室山房集卷三十六

明 胡應麟 撰

五言律詩六十八首

吳郡金公應照令吾邑凡後先六載清風卓操
絕代無倫黌士慕其遺愛將舉祀名宦不佞
恭竊門下敬賦二章

當年武城令故國近三吳睿識懸氷鑑清標瑩玉壺琴

遺何處鶴寫化異時鳬磊落循良傳千秋更有無

素絲傳苦節彩筆擅瑤華彭澤門葳柳河陽縣帶花雲
霄餘宦轍江漢逝僊查寂寂談玄者空悲隔絳紗

夜宿黃季主對奕決賭金伯韶為點籌酣飲達
曙題壁間

念汝能懸榻令余忘憶家香凝燕邸霧燭裊漢宮霞仄
徑眠孤鶴虛簷集亂鴉今宵橘中卧極樂在天涯

送僧還赤城

春遊秦苑外夏返越臺傍
片石幽期遠千峯別夢長
危杉飢鶻墮古柏病猿藏
問訊寒山子題詩遍佛堂

宿狄明叔園亭二首

閒來種瓜墅門巷半垂藤
石室藏金匱星臺控玉繩
茶招陽羨客飯供雪山僧
下榻余將卧清宵話大乘
自是詞人社虛疑上將壇
清香浮畫戟異味薦雕盤
五色瓜紫砌千株橘繞闌
黃梁炊漸熟飽飯話邯鄲

再過狄明叔園

咫尺將軍第重來日未衙
逕添何氏竹畦蔓邵侯瓜
曲榭微生月層樓半納霞
一枰堪度世何地更吾家

送徐廉訪之虔州

為羨虔州路依然偕寇行
關西羣吏送嶺北大僚迎
日擁琬戈艷霞飄畫轂明
五羊天咫尺高眺粵王城

破山寺老衲夜談作

一逕入蒼翠飛雲裊裊屯
危亭標木末古剎翳松根
海月時窺牖山風日掃門
憑呼野衲至信宿共芳樽

過張伯起幼于園中二君各出小影索余題即

席賦二首

乾坤長嘯客林壑自由身
蚤闢東山墅閒垂北海綸
新聲傳子夜麗管握陽春
我亦思逃世貂裘再敝秦

右伯起

何年醉玉京謫籍下蓬瀛
方外唐徵士江東晉步兵
鷗冠雲氣入龍劍雪花明
異日投竿去毋令帝座驚

右幼于

次爪步張別駕留酌署中

欄杆明月下蘿薜暮紛紛翠杓調甘露香厨供彩雲舍

毫春半入剪燭夜平分更喜朝來約三山跨鶴羣

擬次
日遊

金焦余病甚
遂不果往

秋日遊大慈岩作

薄暮肩輿到歸樵處處逢萬尋開峭壁千級上危峯樹
杪禪關出蘿陰梵剎重何當專一壑絕頂卧長松

姬人有從行岩上者躋捷之甚戲贈此詩

岩名
大慈

偶逐天台客桃花照玉顏繡裙時綰霧羅襪慣登山嶺
月生眉黛峯雲動髻鬟不因劉阮至那得共追攀

題祝無殊棲雲軒

小築蘭陰下幽居漱水漬八牕全受月一榻祇棲雲竹
杖占龍氣蒲團臥鹿羣何人日攜酒相對草玄文

輓吳封翁四章

文仲觀察尊人行誼高
卓潛耀弗彰為時楷則

閔閱崇三世絲綸貴九重行高黃叔度名重郭林宗茂
苑新楓落蘇臺宿草茸異時雙廡下誰問伯鸞春

高蹤懸石戶古行鬱泉臺海月長鯨去天風大鳥來河
南傳治行鄴下紹詞才世澤今何限無煩嘆草萊

劍色豐城閔書香茂苑長題銘符季子樹碣副中郎閣

翳新玄草齋繁舊白楊明珠遺集遠光照玉涵堂

封翁
厥考

純叔先生以行名嘉靖
間有明珠玉涵二集

綠埜承先世蒼生付象賢恩波填越海涕泪咽吳天薤
露丹旌外松風素旒前祇應門下客長廢蓼莪篇

送僧遊越東

窮年持戒律行脚遍蒿萊碧海浮杯度青山躡屩來天台方廣寺雪竇妙高臺匣底蘭亭帖相傳自辯才

劉廣文擢北司馬詩送之

漢殿移官入燕臺謁帝行敦詩元郤縠議禮舊荀卿海國朝霞麗江城霽雪明題書頻寄憶翹首北鴻征

越嶺瞻喬卷為易使君仲子題

公子舊翩翩寧親羨汝賢瞻喬離楚服懷橘向吳天柯爛青霞斧帆飛赤壁船太行他日望重賦白雲篇

次日葉孝廉復邀集館中賦

水亭門外望朱戶萬花間逸興饒金谷豐肌倍玉環紫
騮雲雜還黃鳥雪間關宵學山陰棹空成興盡還

妓有
貌甚

豐偉而歌
舞殊佳

寄李左轄

卓蓋江都舊朱衣漢殿新雲霄迴北望山岳動西巡薇
省千花夕棠郊萬樹春何人學徐穉今古接芳塵

劍泉

當年歐冶鑄蓮鍔夜生花赤電飛延浦青虹照若耶風
期絃上得意氣筑傍賒會挈樓蘭首銘功瀚海涯

衛河阻風同張陳兩生小飲作

何限蕭條色相看一坐中乍收霞脚雨仍起石尤風逆
浪衝飛鷺驚沙沒斷鴻移丈岩際滿獨此滯征蓬

登陸行齊魯趙間二首

望望鄉猶隔行行路轉難村醪過曲阜野飯駐邯鄲白
墮誰爭醉黃梁任飽殮憑招呂翁至一問大還丹

乍騁思鄉目聊舒逆旅覓牛羊遙隔岸雞犬自成村隴
麥侵齊甸山花照魯門岱峯雲咫尺如迂丈人尊

余從陸至安平鎮聞傅伯俊明府先一夕過此

悵然有寄

一夜長洲令雙鳬跨碧虛徒飛秦觀夢未達魯連書計

吏黃金詔郎官白玉除鱸鄉亭下路歸客倘踟躕

伯俊別號

秦觀聊城人

贈謝山人

一榻衡門下蕭然共白頭長林中散卧古木謝敷留石
室藏孤憤金庭夢五游剡溪前夜雪曾否下扁舟

項山人季興過訪賦贈二首

柴門朝雨霽鳥鵲噪簷牙車馬何方客新來自永嘉去
偕滄海月歸指赤城霞遲汝秋風夕同扳桂樹華

總為尋詩過難將問字留萬峯陽羨色雙艇石湖秋霧
擁王孫珮星隨客子裘歸來定何日長倚碧雲樓

繫航閣為紀旭仁題

嵯峨揚子閣百尺大江邊竹繞談玄座花藏問字船捲
簾羣壑入散枕萬峯懸夜雪如相過那能興盡還

中冷館為楚宗侯仲和作

勝蹟中冷畔名亭大海頭石欄三楚色金錫九江流谷
有康王卧泉堪陸羽留春芽陽羨熟一鉢許同遊

集郭鴻臚聽歌

赤欄橋子畔來過百花叢一徑延新綠孤亭坐落紅歌
聲全度雪舞態半隨風向夕瑤臺望真疑鳳下空

林山人逸民自閩中來訪賦贈

野鶴閒雲輩何因獨扣關為尋天竺寺來話武夷山客
路松華熟禪房桂樹閒那能待婚嫁五岳早躋扳

過林生啜茗作

七閩山水盡仍艤潑川航一室空林下長齋葉滿床畫
圖傳蛺蝶書札動鸞凰為客烹陽羨雙松正夕陽

送黃廷評

東陽仙隱吏八詠萬家傳政就花連郭秋成秫滿田龍

扳新絳闕鶴舞舊朱絃藉甚王廷尉君看結襪年

客有自金華諸洞返者窮幽歷險所覩甚異余
偉其事而賦之以訂再遊

洞天三十六竒絕擅金華雪壁盤空上冰壺抱月斜玉
桃千歲實瑤草四時花瓢笠吾當去驅羊臥赤霞

燕臺驤首為方元素題

赤驥畫桃花長鳴逐暮笳霜蹄穿大漠電影涉流沙伏
櫪心期壯登臺意氣遐秋風閑十二早晚向天家

毛文學招集命幼子慶郎出見座上賦

何處來英物娟然玉雪同
春山聯寸黛秋水浸雙瞳
異日徵飛兔當年憶夢熊
看君懷橘去誰不羨黃童

王孝廉邀集城西張氏館即席作

結束問東家聯翩到狹斜
綠楊初擁絮紅杏半飛花
綉榻籠輕霧珠簾罩落霞
坐來庭樹色冉冉欲棲鴉

贈謝少廉

舊聞知王謝奇情識魯連
世傳如練句人誦搗衣篇
冠

鷓鴣餘生事屠龍入暮年白門桃杏色次第理吟鞭

送王使君之滇中六首

樓船秋水平汝向碧雞城絳殿分符別黃堂視篆行萬
山藏貴竹孤島闢昆明爛漫東方騎遙知夾路迎

詔書來日下行色動江臯鹵簿專城貴旌旗列郡豪檄
傳巴俗遠詩到夜郎高何處看銅柱飛揚勒彩毫

銅魚分絕塞金馬問長途地入三苗險天懸六詔孤中
華傳製作異域上輿圖新釀椰陰滿何妨醉百觚

不堪垂老態仍對欲分襟杖擬攜卬竹船應載鬱林夷
歌傳白壁漢詔錫黃金何似長安吏窮年問陸沈
西南天欲盡剖竹問羅夷想像千村外驅馳九驛時山
行忘蜀道水戰息昆池臥閣枕榔下能無咏別離
迢遙丹鳳詔燦爛白狼篇弭蓋朝行轡飛槎夜入滇長
途山作地大澤海為天絕域陽春布無勞話瘴烟

聞司馬張公蕭公訃二首

廿載甘棠愛千秋大樹名斷虹燕北路斜日渭南營部

曲清笳送官僚素旄迎東南天半壁誰為築長城
北里丹旌度西江素翼迴千秋申甫業一代管鮑才象
緯中台圻風雲太華摧祇應廬阜色名姓共崔嵬

哭大中丞滕公八首

間代鍾豪傑巍然岳降神三朝傳政績萬國待經綸賦
就悲題鵬書成嘆獲麟何須論夙夜盡瘁見王臣
絕學傳鄒魯洪都陋漢唐君王悲大樹父老泣甘棠百
萬清油底三千絳帳傍尚思龍起日風雨動南陽

羽節吳山駐貂裘漢殿來詩書三代佐文武萬邦才日
慘中丞幙雲寒上將臺祇因秦望石勲業並崔嵬
漸覺三台近俄驚八座空高牙懸落日大旆颯悲風部
曲謳吟外賓僚悵望中佳城猶鬱鬱誰為問滕公
甲冑重闌靜樓船大海閒勲名韓范後籌畧管蕭間月
擁丹旌度雲拖素旄還異時靈爽在長鎮武夷山

七臺初返旆九曲罷揚舲琬琰留中秘輶輶出大廷山
川摧間氣海宇泣英靈萬古真儒業重看配考亭

尚記掄才日雞羣識鳳毛塵埃援錦瑟雨雪贈綈袍德
並生成大情兼怙恃勞百年知己泪遍洒越門濤

念載門人籍千秋國士期長鑣驚老大短褐愧支離宿
草孤帆近生芻一劍遲殊恩何日報慟絕大江湄

挽馬都閫二首

矍鑠聞飛將蒼茫失故侯金章新息在銅柱伏波留已
逐沙場逝寧懷下澤遊至今靈爽在猶自懾壺頭

韜畧知名舊封侯泣數窮前茆沈落日大樹颯悲風馬

革當今羨鵷夷自古同雲臺政圖畫忍沒漢庭功

先宜人不幸棄背泣血苦次志哀四章

一夜西風色俄然到北堂千秋黃壤遠萬感白雲長寂
寞幽蘭思遲迴寸草腸夜臺無日返何處報春陽

忍憶九熊事空餘戒獵言北風頻撼木西日故摧萱玉
匣埋孤隧珠襦悶九原閑居曾一賦慟哭望高軒

刀尺遺中間輜輶向大羅夢迴衣線香寒入總帷多夜
月沈蘭茝秋風瘁蓼莪流黃疊空篚觸目動悲歌

驟得西華信雲輶去不疑
星冠朝玉闕霧幄返瑤池
白日蘭陵暗清霜薤里遲
惟餘嗣宗恨血淚洒殘棋

贈管茂才坤

管子南州傑飄然此地逢
風塵隨燕雀雲霧隱蛟龍
堂上湘妃曲溪頭越女容
一尊何日對相傍采芙蓉

贈趙長吉中舍

何來中秘客巨筆迴如椽
鳥迹羲皇後螺書大禹前
硬黃貞觀帖飛白永和篇
奇字吾猶識能來話草玄

郭生燒一鷺食余甚香美詩以賞之

西園新燕集東郭
鷺鷥羣炙處逢劉毅煇時笑右軍金
盤疑噴霧玉盞競傾雲更有渾羊設奇方欲贈君

宋人以蒸

鷺為湯煇右

軍見筆談

少室山房集卷三十六

欽定四庫全書

少室山房集卷三十七

明 胡應麟 撰

五言律詩八十二首

壽郭金吾

閼閼汾陽盛簪紳
代國留玄關
獨鶴赤縣駐
雙虬覆局青霞爛
鳴絃白雪流三珠
庭下樹冉冉拂瓊樓

早春自西掖過訪宋忠父作

言尋中禁路來問列侯家玉座攀雲色金城步日華池
烟深鎖樹苑漏曲穿花莫笑綈袍敝長裾半赤霞

醉卧趙文學榻上遽然甚適覺賦此章

頽然聊一榻酣卧碧紗長極樂知仙界溫柔羨帝鄉春
疑迴大庾賦已就高唐可怪黃梁熟莊生興未央

送鍾天毓南還二首

送汝木蘭橈高天正沲寥楓行揚子岸柳折灞陵橋麗
賦三都擅狂名六館饒東溟聊一息奮翮上扶搖

寂寞中涓後何人問駿才藏書還禹穴抱賦出燕臺大
漠新霜下長河片月來異時重入洛雲色埽蓬萊

贈丁文通太學

邂逅咸陽市干將照白虹新詩傳敬禮舊夢識文通業
豈吹竽賤心猶擊筑雄寧親暫升斗奮翮待天風

臨淮史夫人挽章四首

令族姬姜並賢聲孟衛流貴從周太保體敵漢諸侯寶
匣飛鸞鏡瓊簫咽鳳樓預知陶氏冢新兆卜眠牛

雲輶飛絳闕哀詔下明堂大樹猶撐日芳蘭驟仆霜泉
臺春寂寞石室夜蒼涼冉冉靈妃珮乘風度七襄

嘆息蘭闥底悲風一夜多星芒沉寶婺日彩斷銀河跨
鳳佳期阻九熊舊事過鍾情潘岳甚其奈二毛何

寵數頒宸極恩光備寢筵珠襦藏大隧玉匣閔重泉懿
德絲綸著芳聲竹帛傳談詩憐哲肩淒斷蓼莪前

題何仁仲園亭二首

采采白蘋洲三湘欲盡頭危欄雲夢夕飛閣洞庭秋漁

父持竿過靈妃結珮遊武昌新水發遲我木蘭舟
別館寄清沙飛費觸望遐徑移湘浦竹溪浣杜陵花萬
岫交明月千林逗彩霞牆東處子麗莫是宋生家

甘露園二首

為園近茂陵甘露遍垂藤月底寒猶墜風前曙欲凝餐
蓮疑太華淪茗勝中泠試作相如賦誰云渴未能
泠然松竹徑點綴自何年北固昭明寺中嵩慧可禪寒
生金掌外清注玉壺前好傳何郎頰朱衣拭更妍

同李惟寅何仁仲集朱汝修觀梅花

一尊春興劇花下共傳籌艷質霜先避清香月並流詩
憐羣玉句人倚仲言儔恍入西湖道吾家萬玉樓

送王伯固之臨漳

承恩出尚方躍馬向臨漳身是王喬族官鄰子晉鄉笑
蓉周闕紫松柏魏臺蒼預聽鳴琴日陽春滿未央

送吳翁升還雪上

河梁樽酒暮一騎向飛沙旅服驚霜樹歸裝冒雪花豪

遊新北闕艷賦舊東家好去苔溪上羣姬輟浣紗

雪中過孟弢不值

渡落懷同調經過問索居雪花行剡曲雲樹隔匡廬大
業元龍劍微名尚鹿車不知玄草外奇字近何如

子玉以大計量移賦慰

三嘆崔亭伯清風玉不如吏情甘慘淡公府絕吹噓考
署陽城拙名成谷口愚祇應宣室夜前席治安書

聞王閑仲得雋燕中志喜二首

閼闔三朝舊弓裘四世新霜蹄金駉驥天種石麒麟桂
擢燕山夜梅標碣石春平康花似綺結束待車輪

金泥初帝闕玉樹舊王家間氣鍾三葉奇葩炫五花追
風橫大漠躡景度流沙寧似吳宮外窮年學浣紗

大學士趙公招飲小憩章行父館中作

尺五瀛洲路頻過戶不扃漏長中極殿

時趙公尚
視事閭中

春滿

太玄亭

行父方館穀
大學士門下

舞鶴花間度飛鸞竹外停最憐調

鼎暇吐握共忘形

是夕留飲至丙夜詰旦再呈此章

紫極方延佇黃扉乍卜歡上公能結襪羈客盡彈冠玉
鸞移中禁瓊漿出大官夜闌台斗色清切動長安

訪蘇君禹城南別墅時郎君新獲雋計偕二首
韋杜城南曲經過路不遐重垣千樹棗曲徑四時花楚
思融春雪燕歌促暮霞日斜羸騎返睥睨半棲鴉

豈是東山墅頻張北海筵帝城雲色近仙掌日華懸舊
燕紛窺幕新鷺促和絃坐看池上鳳矯翼向甘泉

雲嶺真松卷為崔母楊孺人題

朗月懸西極高風勁北堂雲松千尺秀氷蘖萬年芳跨
鳳春情杳九熊夜漏長惠文看哲胤飛詔下明光
一醺悲前事三遷訓後賢即今衣繡日猶是斷機年黃
鶴瑤池下青鸞玉座傳蚤知驄馬客風化遍淮瀍

題楊孝子卷為世叔孝廉

當年排帝闕萬死白虹知楚澤長醒夜燕臺困餓時有
天號半救無地獻三芝藉甚遺孤在干將對陸離

過蘇生期歌者小謝不至戲作

寂寞看花興，徬徨伐木歌。
虛聞鶯出谷，未見鵲填河。
暮雨當窓斷，春星入戶多。
明朝攜小謝，池草夢如何。

贈騷兒

騷兒才五歲，意氣欲凌霞。
骨已徵千里，書應誦五車。
神清珠在握，體潤玉無瑕。
莫作雞羣擬，終當勝阿爺。

送鄔子遠還京口

倦索長安米，言尋舊鶴羣。
傳家中憲業，負笈太玄文。

鄔生

為中憲公孫
中憲有詩集

客路櫻桃雨歸帆杜若雲卜居何日事攜

爾大江濱

贈胡孝廉昌世

旅食渭橋邊青萍儼舍懸驪珠溟海握駿足薊臺捐謁
帝留孤憤逢人話太玄憑收嫁時淚曾有惜嬋娟

贈璫樹為顧朗生

艷色真瓊樹豐肌倍玉環紅粧停夜月翠黛壓春山飛
鳳秦臺下游龍洛浦還相思幾攀折遮莫髣毛斑

臨淮席上蔡生乞詩作時王山人在坐

龍陽君已貴一笑眼能青玉樹標前砌金莖夢後庭聲
馳千里驥歌送五侯鯖莫以安期舊揶揄蔡克靈

過王山人啜茗作

束書來薊北題賦遍江南不慕千鍾粟時分一味甘
蒼筠搖午夢黃葉墜清談細酌天池坐何殊繡佛龕

鍾天毓過訪索詩賦贈

沾沾越吟客窮巷又移居舊著叅軍品新臨太傅書花

香縈短屐柳色傲長裾寂寞黃金館誰今問子虛

朱山人以非罪淹獄賦慰

泄柳門時閉鄒陽獄未甦瓜田寧納履藥肆尚懸壺業
就肱先折愁深目半枯青天覆盆底見汝出窮途

過劉茂才百世讀其玄珠諸稿作

似汝年猶少投予賦已工青藜三世後赤幟萬人中
朗潤知潘似清揚憶衛同韶顏吾盡擲一愴異時紅

送人遊塞上

曉發灞陵橋，彎弓箭在腰。
黃沙隨地濶，紫塞極天遙。
玉乳蒲萄熟，金羈苜蓿驕。
賀蘭千百仭，飛騎上宮堯。

送章秀才從軍

白草暮蕭蕭，黃榆葉半飄。
四時風不斷，經歲雪難消。
大磧逢偵騎，平沙見射雕。
兵鋒隨所指，百戰靜氛妖。

贈楊文學

身世一袍青，柴關盡日扃。
鹿門傳舊業，玄閣抱遺經。
玉樹祥雲擁，金莖湛露零。
異時飛紫詔，何羨客為星。

和趙相國懷山八咏

棲真居士

北極恩偏注東山興未窮民猶歌畏壘帝已問空同絳
闕星辰麗彤墀日月崇寧知西竺想寤寐化人同

六虛主人

翠屏羅窈窕丹壑敞嶙峋獨占三山色長棲六洞神雲
霞居士夢宇宙宰官身幾夜騎羊客傳書到玉宸

二初牧侶

煉藥開金竈宣麻上玉除黃庭弘景錄碧洞稚川書鶴
化珎霄後羊眠叱石餘赤松如待牧前席為誰虛

紫霞洞叟

巨磴山腰豁流霞洞口平闕疑屯紫氣館憶坐朱明草
色金光綻桃脂玉乳瑩為探輕舉候少俟大還成

靈溪漁父

澤畔吟初就溪頭望未涯坐攜青竹篠行趁碧桃花錦
曳千林霧綃疑萬樹霞秦人遺核在一種帝王家

白雲樵客

古樹白雲含晴光上鬱藍為霖今塞北挾霧舊東南石
上凝蒼靄峰頭雜翠嵐萬方膏雨洽出岫詎空談

湧雪寒翁

一澗蜿蜒出胡麻飯有無雲淙穿石竇雪乳噴冰壺峽
峭憑舟探潭深藉杖扶隔凡天咫尺歸夢夕陽徂

玉露丹仙

石室清虛畔研朱坐次寥空濛流月窟點滴貯天瓢掌

憶金仙近盆憐玉女遙他年把周易騎鶴上宮堯

哭汪司馬伯玉十首

太函司馬齋名白榆社名

北闕懸車蚤東林曳杖餘神留中土卧帝命太函居五岳藏玄草三天墜白榆庭堦雙玉在雪涕茂陵書

青萍懸虎穴赤幟樹龍門居後楊寧恥齊名杜轉尊星樞摧軫翼天柱折崑崙白玉樓前侶飛雲限九閭

司馬為弇

州同年友又齒差長且文望相亞而極意推轂弇州感之甚數自言于余

杖鉞平邊塞麾戈逐戰場風霆流武庫河斗燭文昌玉帳三

韓外銅標百粵傍祇今吉甫頌猶自播夷方

伯玉嘗于白岳建文昌祠

黃山初謁帝玄扈舊棲神華夏悲司馬春秋痛獲麟名猶標泰岱魄已化星辰寂寞東南事文章孰後塵

一榻中林畔如椽大海頭豐碑騰六合巨榜揭千秋妓狎東山卧賓殘北海遊瑯琊雙墓在天意合吳鉤

漢閣空劉向揚亭逝子雲中原誰步武上界已修文馬骨驪黃外蛟珠鴨綠瀆異時傳汲冢一代有三墳

浮生偕電露名理悟礪風濁酒談中聖清齋問大雄淨

名居士榻忉利梵王宮此日三車去懸知二業同

黃粱殊未熟大夢竟難呼兜率天高下遮須界有無文成

歆上帝草定屬潛夫伏櫪今誰辯長歌碎玉壺

公嘗以全集屬余校定

龍宮開淨業鷲嶺學枯禪障息三天外神遊萬劫前空

花函谷夢祇樹肇林緣誰復偕蘇晉長齋繡佛筵

邂逅平原飲飄然夜雪過寸心雄海岱隻語廢江河落

日生翳遠悲風大樹多如澠猶夙昔萬恨擲蹉跎

香山寺流憩亭小酌逢張鄭應季四文學邀宿

華嚴洞余與諸子素昧平生酒酣興發策蹇十里從之詰朝復抵碧雲泉上

十里華嚴寺重遊不厭頻攜尊三市客擊筑五陵人野篠長封雪池蓮不受塵故園滄海上飛夢繞垂綸

送倪明府之桐城

河梁尊酒別霜樹半遙空駿市燕臺上鳬飛漢殿中
花城畔月桃葉渡頭風最羨琴堂色青蒼對皖公

送李少府

都亭尊酒別秋葉，照離筵。菊綻燕臺下，松哦越嶠前。孤
航衝雨雪，短劍拂星躔。咫尺徵賢詔，黃金漢殿前。

送趙進士使太原

秋水木蘭橈，雙旌出渭橋。飛雲行上黨，積雪過中條。謁
帝朱衣近，寧親繡服遙。向來龍劍影，輝赫電光搖。

過董中翰體仁，余廿載前舊友也。別後始授室。

燕中今一子已踰冠矣。感念今昔，為之惘然。
廿年燕市客，爾外更誰存。逆旅推耆舊，他鄉見子孫。花

香分玉殿藜火直金門笑我青衫敝西風曳帝闌

同王行父李叔操徐象先諸子十日飲作

嬾習干時技聊同玩世人華陽寧異代河朔動經旬旅興先黃菊鄉愁過白蘋莫教龍劍色容易射星辰

廿載前讀王汝化詩已意其為古人邇晤李本建乃知此公僅百齡尚無恙也因賦一律寄之

磊落王宮翰青編入夢頻那知三楚客遍閱五朝人藝

圃占靈藥詞林頌大椿前村武陵洞相對幾遺民

送汪象先伯仲還新安二首

嘆息金蘭逝參差玉樹長多才秦別駕雅量陸平章馬
鬣封仍下龍門副永藏河橋相送地拭淚滴干將

煜煜名家後翩翩上國來玄經司馬業文賦士龍才玉
閤豐干社金殘碣石臺喧傳茂陵詔漢使下蓬萊

送何仁仲之南都二首

去去何公子春風一騎寒含香辭上國傳粉入長干桃

葉江帆穩梅花郡閣殘芳洲尋白鷺何似故園看
祖帳春明外桃花別路長暫弢題賦筆初綰納言章觀
入新鳩鵲臺呼舊鳳凰畫遊懽咫尺一水是瀟湘

送崔子玉之逢州

春水潞河舟春風拂面柔飛驂臨劍閣別駕問刀州嬾
卜嚴遵肆頻登杜甫樓巫山行雨暇入夢正高秋

送人還四明

悵望春風色河橋落照間酒人三市別狂客四明還再

舉看黃鵠孤飛羨白鷗新粧佇蘿下吾夢亦潺湲

送區學文還嶺南

彩筆吾哀甚驚看白面郎家傳周太史殿賦魯靈光上
國啼鵑盡東風結駟長羅浮花事早月夜見明珠

集張仲立館中同胡孟弢賦

世事真雞肋吾儕日蠚螫撩人偏笋蕨作客又櫻桃業
豈窮來擅名應醉裏逃相看聊起色毋擬曲江濤

胡昌世張仲立過訪小集

何限春風色長安醉碧桃雙攜蒯緱劍一話鬱輪袍射
虎心猶劇屠龍思並豪平康花爛漫未肯負持螯

哭李能茂五首

命豈文章達才偏造物憎霜蹄殘騷衰風駟墜鯤鵬大
業愁中廢雄圖悵代興蘭陵川上酒猶憶共如澠

肺病呻吟外魂搖棄擲年千秋遲白紵萬恨劇青毡雞
鷺爭誰得龍蛇命豈然玄亭莽空濶愁絕異時傳

世事狂歌外人才太息中篇章亡白賀翰墨逝冰邕弱

女啼荒徑孤嫠咽殯宮棠梨最無賴滿樹發東風

李生書學

王復吉翻
近之

世誰憐薄祿天亦忌雄才落月長鯨去悲風大鳥來遺
書殘竹素舊宅翳蒿萊絕頂芙蓉上曾同眺越臺

青山曾不厭朱紱定誰強宇宙瑤華歇川原玉樹藏無
年嗟太傅有業恨中郎寂寞安昌第堪誰到後堂

達父齒僅四旬一女無子蓋生平未嘗廢佔
畢業垂就而年阨之造物之于材豈其真有

所忌耶

送沈明府之竹溪二首

一騎蘆溝畔西風落葉號那知花縣客猶是竹林豪霧
擁雙飛鳥霞蒸八咏毫黃金懸漢殿側席待賢勞

暫握銅章去花封未寂寥囊琴辭上國岸幘望中朝賦
就湘潭竹書傳雪水苔吳娃粧閤畔計日候蘭橈

少室山房集卷三十七

欽定四庫全書

集部

少室山房集卷三十八至四十三

詳校官編修_臣 槐

侍讀_臣 孫球覆勘

總校官庶吉士_臣 何思鈞

校對官中書_臣 王鍾泰

謄錄監生_臣 張士琛

欽定四庫全書

少室山房集卷三十八

五言律詩八十三首

明 胡應麟 撰

永叔方舟豪飲即事十首時行次齊魯衛間

彩服榮新命綈袍戀舊知
河梁晨艤棹水國夜銜卮
渡遠攜桃葉灘長和竹枝
踈燈解娛客花艷撲談詩

錦席時先後清尊日過從
荒城嚴夜柝遠寺咽昏鐘
意

氣紅顏盛心期白首濃即今元禮棹誰復共林宗

鼓吹中流發圖書四壁陳高談迴丙夜大雅和陽春水
驛馳關吏津亭候榜人雄飛吾黨事一快倦游身

海月維仙纜天風度客檣賦題新赤壁吟和舊滄浪汎
汎俱西子依依但北堂江魚如玉雪滿載大家嘗

雲霄慙比翼湖海豁遐心一駐青絲竿同攜白玉琴清
吟霞色爛劇語露華侵快意蓬窓下天池酌水沈

大有乘桴興能無汎宅游垂天雙翼左縮地寸心投鹵

薄黃河岸帆檣碧海流支機懷袖滿昨夜到牽牛

攜來雙彩筆寒夜互生花雪擁山陰棹星偕博望槎鴈
聲流古塞螢火亂平沙幾憶春明外長燈對棣華

恒叔同卿

改南

河朔當年事平原異代盟登仙班景倩為客孟雲卿
揆杞晨霜滑維梢宿雨晴如澠政堪賦蓬底百壺傾

擊楫神俱王垂竿興未徂飛談凌海若長嘯挾天吳
珮仍三殿金尊暫五湖寧知奇偉客唱和在菰蘆

汎鷁垂冬半呼盧過夜分燭花深對酒囊草細論文湖
欲名高士灘應號使君千秋吾道遠未遣世人聞

舟中即景十首再呈永叔并寄李惟寅宋忠父
二君

漸喜雲天豁猶憐道路長大河風烈烈平野日荒荒疊
浪蘆根黑飛沙木末黃翻思載圖籍片楫漾瀟湘
寒蘆沙浙瀝遠樹岸滌沔挂席天疑近揚舲地欲迴登
仙偕李郭望氣合張雷咫尺扶搖思無嗟六翮摧

曉色南風正狂歌岸接羅魚龍浮大澤鴈鶩掠荒陂貫
月槎飛動衝星劍陸離深知五湖客不為載西施
靜夜銜杯坐天風襲錦袍推蓬霜半入鼓柁月全高宇
宙捐雞肋河山劃蟹螯何慙古名士痛飲讀離騷

天末歸人興臨流賦式微長風簫鼓發細雨舳艫飛入
饌黃雞嫩傾筍綠蟹肥沙鷗似相識檣底日忘機

劇飲嗤投轄長歌樂扣舷推敲殘月下欸乃亂風前
黑鷺鴻墜沙明宿鶯拳將因苔雪去老占孝廉船

土俗經行異風烟
逐望遐獵人爭雉
兔罟客售魚蝦水
柵平連市山城曲
抱衙夜闌渾不寐
秉燭對棲鴉

此日逍遙興平生
汗漫遊客星寧帝
座卿月且仙舟巨
鎮臨關出洪河抱
驛流人烟十萬戶
問是古營丘

代北游真懶齊東
俗未訛荒郊環棗
柿古壁蔓藤蘿宿
霧氷生井微霜月
度河塞舟王子興
將奈越人何

一代交游盛豪華
冠洛中有天皆碣
石無地不新豐浮
海憐孤客登壇憶
上公并州何處望
老淚盡寒空

送李掾之南康

好去尋詩客，聊同捧檄人。
雲屏高嶺外，雪瀑大江濱。
水驛魚成市，山衙虎作鄰。
琵琶亭畔月，一曲夜誰親。

南歸倉卒，宋忠父邀餞齋頭，不及赴，寄別四章。
飄零辭越日，留滯客梁年。
憶過西寧宅，頻開北海筵。
觀棋晴雪後，秉燭曙霜前。
長夜真堪樂，誰令縱酒船。
午夜攜燕妓，當年賦洛神。
草縈青玉案，花亞白綸巾。
上國三千騎，華堂十九人。
最憐傾蓋日，局促侍車裋。

橫槊風流甚登壇意氣饒上官留絕唱神女戀清標巫峽雲來去昆明石動搖永懷雙玉樹花下醉深宵

上官昭容

評沈宋昆明詩見唐襟說

賦頌元推楚才華夙擅唐九歌傳正則十字叩賓王釀秫開霞館烹茶構雪房東籬攜手別夢寐菊花黃

寄李惟寅兼懷王朱兩生四首

咫尺憐分手徘徊各斷腸離心搖海國淚目限河梁珮我雙龍紫驅君獨馬黃廿年彈指恨頭白少年場

落魄長安市，抽豪興遏雲。醉呼嚴僕射，狂揖衛將軍。玉
饌遺鯖渥，金羈簇馬勤。別來知己夢，愁絕亂絲紛。

披褐寧高隱，攜書異昔遊。一身投蜀國，十口寄并州。幕
借桓溫府，床移庾亮樓。即今離合事，萬感碧雲秋。

意氣聯三俊，聲華軋四豪。章徒騰薏苡，貢已入蒲萄。王

粲從軍樂

仲宣有
從軍樂

朱家結客勞，濠梁倏千里。飛騎贈綈

袍

仲冬朔舟次南旺閨中暮夜得雄鐙下發書報

家大人信筆志喜四律

庭樹先春發堦蘭入夜茸帝心憐敝族天意繫哀宗覽
社明孤蚌高陽兆一龍桑弧挂篷牖差快浪遊踪

圖籍曾先世弓裘盼後人芝蘭聊慰念梨栗漫生嗔謝
氏庭階茂陶公戶牖貧尺書連夜發先報白頭親

但說充閭慶都忘立壁愁百年今始慰五岳暮仍遊入
掌珠先媚看肌玉並柔笄廬三萬軸累汝漱江頭

作賦長安邸談詩大海湄千秋吾自得再世爾何遲貴

敢希龍種痴從笑虎兒蹉跎罔極恨無計起萱墀

是夕寒燈結花甚艷蕾倍若叢珠更賦二律

一夜寒燈色飛揚照客槎乍看叢綺樹誰為擷瑶華繡
幙籠丹霧紗窓暈紫霞支機寧待卜天意茁蘭芽

燈花寒更結喜色炫歸槎金粟呈雙穗瑶芝發九華光
輝流素月彩艷燭明霞一慰東山望庭階玉樹芽

夜半篝燈寒甚余推篷出則雪深尺餘花艷若

晝明晨兩畦玉樹璀璨成行永叔賦詩以謝

庭見況和畬二首

璨璨奇花發亭亭玉樹陳吾寧湘水客爾亦剡溪人鶴
展瑤臺翅龍拖貝闕鱗故園三畝在歸思起垂綸

莽莽乾坤內悠悠一腐儒乍忻蘭吐玉敢詫樹呈珠八
駿休黃竹雙龍儼白榆時新得家弟含飴歲除日好慰謝庭

趨

稚升席上再與永叔言別

永叔先還天台

節序驚殘漏睽攜悵此晨平原曾十日河朔更三旬積

雨留淮騎飛霞度海人書傳二仙媛為掃石牀塵

中叔衙齋小集

郡郭全披霧衙齋半住山狂吟修竹下沈飲落花間別
夢將雲到新詩問月刪萬峰京口勝歷歷待躋攀

暮登金山同永叔憩閔山人軒中

一龕聊避世絕頂見高秋舸艦維青雀軒窓借白鷗江
風傳磬遠山月照幢幽瓢笠吾將去相攜問十洲

郭叅知過訪旅中賦贈

南粵文章吏東曹禮樂臣生花景純筆折角介休巾鹿豕親遊屐魚龍駭釣綸百年傾蓋誼偏向白頭親

香雪齋為郭張虛茂才賦

茆齋餘十尺香雪綻雕欄獨樹孤山老千花大庾寒高樓吹漸落古驛寄仍殘欲喚娉婷語師雄夢未闌

送趙太學

尚寶傳新命飛航悵別筵恩光龍闕下春色鳳池前綠草燕山旆紅蕖越水船相門經術在奕世重韋賢

次高唐旅邸戲題

旅跡真無定，踟躕舊驛堂。
朱榴晴綴火，綠樹午生涼。
岡勢蟠堤曲，河聲嚙岸長。
將無夢神女，地入古高唐。

過王世叔舟中留飲同說仲君倩作時王世叔
方出獵歸二首

亦知金甲貴，頻許布衣遊。
短劍攜孤客，長纓問五侯。
碁酣紅日墜，箭駛白虹流。
快意平原獵，高天控紫騮。

說劍樓船上，霜華照轆轤。
將軍長揖重，處士少微孤。
日

香青油幕風酣白玉壺誰同霍驃騎橫槩賦三都

是日世叔座中出八帶魚供饌余夙聞未覩即
席復成此章

異族來東海鮮鱗出上都一身同水荇八足擬天吳玉
筯餐偏美金盤薦未孤當年五侯客飽飫此君無

舟中觀漁人舉網再賦

寧知濠濮思咫尺在樓船水鏡冰鱗躍霜刀玉鱗傳黿
磯東海上鱸網太湖前後夜披裘去寒皇帝座懸

贈徐生睥民

豈是荆高輩沾沾易水潯屠龍先世業射虎壯年心斗
室長懸劍匡床獨貯琴長門新賦就未肯博黃金

同厚之過潑元池上觀魚

翠幙清風遠雕欄赤日微熒煌朱鬣動撥刺紫鱗飛南
國鱸應美西山鰕漸肥長竿一千尺歸釣子陵磯

夜集王將軍園亭留宿齋頭二首

劇飲連朝暮狂歌動斗牛樽纔空北海榻已下南州繡

禡明霞綻紗廚霽月流佳期近三五重訂庾公樓
邂逅青油幕觀碁興未徂為園當薜荔鑿沼近菰蒲雨
砌黃金甲風窻白玉壺不知韋杜曲三過拾遺無

秋日同顯卿潑元厚之過城南禪院小憩作

名香聊一炷山色滿繩床初地談真諦空門對坐忘維
摩身是幻梵志爪偏長擲杖吾將去西林下夕陽

同茅徐兩生過潑元太學園中時秋海棠盛發
劇飲暢歌遂至丙夜

曲榭延秋色名園傍午橋晨霜山果熟宿霧海棠嬌綠
水銜堤近青林抱郭遙參差發狂興醉墨滿芭蕉

相國趙公以犀簞文綃見貽各賦一律為謝

製作商觚並珍奇漢簞留來從蛟室底頒自鳳池頭入
水驅魑魅通天象斗牛何煩百觥舉一飲媿難酬

右簞

錦帳非金谷絲綸借玉堂青綾遙動色綠綺暗生光萬
縷含風細雙織襯雪涼寥寥解衣事凝望碧天長

右綃

懷梅客生二首

授策紛紜際成功
顧盼間虬髯銅柱塞燕頤
玉門關選士迎
黃石陳兵上黑山
凌烟三百仞圖畫定誰攀

油幕羣趨夜胡床
獨坐時濃霜
花墜笛殘月
茗收碁獸錦中朝
錫貂裘上谷馳呼韓
今絕塞憶共請纓時

徐象先訂約同發而榜人留滯余待之不至殊

悵然

望望幽并隔行行汴泗來城荒頽枳棘殿古蝕莓苔尺
水憐魚服長途滯駿才夜看雙劍氣能復射燕臺

同吳叔嘉黃說仲懇開寶禪林浮屠雪山設伊
蒲供并出紙索書即席賦得雲字別二山人
梵刹斜陽裏孤舟繫水濱竹林幽把袂蘭若淨論文古
碣橫蒼靄疎鐘出亂雲寧知虎溪上一笑是離羣

雨過茅生賦贈二首

茅自云
初成後

一室長安市蕭然靜者踪途逢茅季偉夜飯郭林宗細

雨花臺奕寒飈竹院鐘華陽何日返白眼臥千松
易水才容棹君垂百尺綸巨先原任俠方朔豈長貧坐
有含毫客門多擊筑人懷中雙刺在肯逐五陵塵

夜泊彭城夢家君作二首

九月南徐路椿顏入夢頻太行雲喚客東海月迎人桃
葉新歌扇蘆花舊釣綸篋中萊子服先拂上陽塵
乍輟三更枕初迴萬里航眼青猶上國頭白正高堂歷
歷瞻鴻羽呱呱憶雁行應知海籌屋遐算八千長

璧社湖作

行行南服近望望北辰孤巨浸浮三峽驚濤入五湖蛟
龍晴自鬪鸛鶴夜相呼明日江東客相逢鱸玉鱸

界首晚泊

繫纜依高樹推窓坐短篷地偏秋積潦湖近夜生風鱸
縷銀條白粳炊玉粒紅飄飄芋蘿夢漸過越臺東

惠山泉上小憩薄暮入僧房觀王孟端竹壚

玉井甃銀床山泉噴石梁江寧擅揚子谷豈後康王石

鼎流雲潤銅瓶貯月涼竹壚煨苦茗彷彿孟端狂

盧使君追步隱侯作後八咏詩不佞次題倚和
倚檻思民力

碧檻抱朱樓高憑動斗牛桑麻深遠墅禾黍匝平疇
海仁風遠宣城惠績流跼蹐念民力漫擬仲宣遊

瞻斗望京華

靜夜胡床坐遙瞻萬里還清光流北極爽氣動西山
鶴羽思仙蹟龍鱗憶聖顏異時香案吏翹首玉宸班

芳園傷啼鳥

複道春風起黃鸝
晝滿林間關
流葉底
睨睨出花陰
綺陌傳金縷
紗窓和玉琴
願偕韶濩響
一奏未央深

名園惜落花

把酒高城望春光
正暮天落紅深
小逕新綠漲
平田粉翅迷
蝴蝶芳心泣
杜鵑誰憐
隱侯病憔悴
百花前

署府聞秋笛

何處拈長笛
飛聲弄月明
梅花千萬樹
一夜落江城
隔

座桓伊思登樓越石情洞庭秋水濶嘹唳雁鴻鳴

江城暮聽笳

幕府秋笳起隨風度海濱哀音搖落日逸響度寒雲斷
續邊鴻羽飛揚塞馬羣萬方烽燧熄無擬玉關聞

倦遊懷畎畝

豈為東方戟沾沾舊草堂風流傳蜀郡政績重淮陽海
岳閒情遠雲天健翱翔故園聊寤寐前席待龔黃

高嘯隱烟霞

逸興黃堂上高情碧海涯
勛庸留社稷寤寐落烟霞
八邑聲同著三朝望正遐
陽春誰倚和萬古誦瑤華

贈狄將軍鼓琴雙鬟

有序

黃河遇狄明叔沙棠聯下雄
飲達旦凌晨策騎同登彭城
子房山南望雲龍放鶴諸阜
狄生連醵巨觥余命小奚吹
鐵笛振袖絕顛超然遐想昏
黑還舟明叔盛為具呼小鬟
鼓琴侑觴余醉而復醒數四
榜人告東方白久迺

罷許為狄作長歌先賦此贈侍者

追歡連日夕小隊出霓裳
入指朱絃媚含情綠綺長
新聲傳舞鶴舊曲和求凰
何似歌桃葉盈盈在畫堂

輓楊明府遇二首

夙昔俱童稚親情四十年
尋詩燕雪底作吏海雲前
草闢依山墓蓬侵負郭田
豐城墜牛斗誰掘兩龍泉
一病歸何早空齋種白楊
尚期中散出不謂太玄亡
舊宅扃南院新阡樹北邙
乍宵鄰笛過涕淚盡山陽

送郭廣文之南康

射策時方棄明經路未窮
倚齋飛瀑底驛路亂山中
赤葉明楓樹黃花綻菊叢
琵琶亭上雨秋色正連空

送王中叔比部北上二首

乍擁三秋楫言乘八月濤
日華仙掌近雲色帝城高
獄底占龍氣池頭憶鳳毛
羨他詞賦客強半在西曹

大旆飛紅葉閑門閉綠苔
雙蛾辭玉洞獨馬赴金臺
瓊挈中泠去藜招太乙來
君王受釐夕刺刺嘆雄才

中叔以潤州倅還

送陳廣文自上海遷池州

乍奪唐宮錦仍浮漢使槎
岸楓霜染葉籬菊雨催花
地坼行三泖天窮望九華
異時窺絳帳問字幾侯芭

寄王伯固明府劉百世茂才

尚憶南皮飲圍爐夜唱酬
仲宣才冠世公幹氣凌秋
藜閣新編啓蘭亭巨軸留
重逢定何日冰雪倍離愁

少室山房集卷三十八